

KEREKE YA LUTERE MO BORWA JWA AFRIKA

Thero ka Sontaga o o bidiwang Jubilate, e le ka 29. 04. 2012

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 227 - 213/221

2. Thapelo: Morena, re a leboga, ka o re abetse go dumela mo go wena yo o leng Modiri wa rona, wa dilo tsotlhe. Go na le masaitsiweng a a beilweng gore re a bone ka go fiwa ke wena. O re fe gore ka tumelo re bone legae le boitumelo jo bo mo go wena, re se diiwe ke dikeletso tsa rona, le e seng ke dithaelo tsa lefatshe le tsa ga Satane. O re fe matlho gore re bone mo Lefokong la gago gore legae le re le baakanyeditsweng ke wena ka Morwao Jesu Keresete ke le le nnelang ruri, o re fe matlho ao ka ntlha ya tshiamo ya gago e e mo go Keresete Jesu. Amen.

3.1 Epistolo ka fa thulaganyong ya 2 e kwadilwe mo go 1 Johane 5:1-4;

3.2 Efangele ka fa thulaganyong ya 1 e kwadilwe mo go Johane 15:1-8.

4. A go ipolelwe tumelo ya bokeresete!

5. Sefela sa 220 - 205/214

6. Thapelo ya mmadi wa thero.

7. Epistolo ka fa thulaganyong ya 4 e kwadilwe mo go 2 Bakorinthe 4:16-18, e re: "Ke ka moo re sa nyemeng moko. Mme le fa bomotho jwa rona jwa ka kwa ntle bo fedisiwa, jo bo kwa teng jone bo ntšhwafadiwa ka letsatsi le letsatsi; gonne tlalelo ya rona e e bothofo ya nako e khutshwane e re direla letlotlo le le sa khutleng le le gaisang tsotlhe la kgalalelo, ka re sa tlhokomele dilo tse di bonwang, mme re tlhokometse tse di sa bonweng; gonne dilo tse di bonwang di a feta, mme tse di sa bonweng tsona ke tsa bosakhutleng." Amen.

8. Thero: Barategi mo Moreneng wa rona Jesu Keresete, go na le kgalalelo e re e lebeleletseng. A re lebeleletseng, re lebe ka matlho a tumelo kgalalelo eo e e ka bonalang. Go bola le go onala le go tsofala fa go bonalang ga go ka ke go phadisannngwa le tsoseletso ya Mowa e e dirwang ke Modimo. Ka metlha mo mothong mo bofelong jwa botshelo jwa gago ga a tshole a gola, ke raya kwa motho e leng yo o tsofetseng, yo o tiileng ka fa tlhaloganyong le mo mmeleng. Ka iketlo, ka iketlo go tswelala pele go tsofala ga mmele. Mme mo tseleng eo ya go tsofala, go a diragala gore o ratwe ke matlhoko, le malwetse. Fa konalo le botsofe bo tswelala pele, le matlhoko a tswelala pele, a tiia mo go maswe.

Re a itse gore gantsi go a diragala, fa motho a tsofala ka pele, re ka lemoga gore tsela ya botshelo jwa motho yoo e tsamaelana le go tlhoka go otlwa sentle a sa ntse a le yo monnye. Go na le dingwe tse di tsofatsang ka pele, gongwe tse di kgopisang motho, tse di dirang gore a we. Re bile re itse gore ga se malwetse otlhe a a tshwarang motho a a ka a tlhokomelang ka go tlhokomela. Motho o ka lwala sebaka se sekhutshwane, gongwe se selelele, mme a sa tlhokomele gore bolwetse jwa gagwe bo tswa kae.

Re buisa mo go Paulo gore Jesu Keresete yo e leng Kgosi le Ngaka e kgolo o itse ka pejana gore bolwetse gongwe go latlhegelwa ke thata go tlasela jang, le kwa bokoa le bolwetse bo tlaselang teng. O itse matshwenyego a

botshelo jwa rona, o itse tse di re tshwenyang. O dirile gore re tshwane le dijana tse a agileng mo go tsona gore a busetse botshelo jo bo botoka mo go tsona, e le Mmoloki wa pholoso. Bokoja jwa dijana tseo bo fitlhwaga ka boganka jwa Mowa wa Modimo o o re felegetsang. A ga se kgakgamatso e kgolo go bona gore Keresete o ntse mo go rona ba re leng dijana tsa letsopa, ba re itsiweng ke loso ka metlha. A o ko o akanye! O tsenyang, gongwe o tshelang mo dikgwaneng tsa gago mo gae? A ga o tsenye mo go tsona ka nako nngwe le dilo tse di ferosang sebete, tse di tenang, jaaka nama ya se se suleng, gongwe mala? Wena yo o kgaphang mo ntlong o rwala boloko ka eng? A ga se gore o dira jalo ka sejana sengwe? Go ntse fela jalo ka mebele e ya rona, le yona e tshwere bosula bongwe fa pele ga Modimo. Mo bofelong e dirile tiro eo ka nako e Keresete a tlileng ka yona go e golola, le go e tlhapisa, le jaanong o dira gore a e tlhapise. A ntse a dira tiro eo ka metlha gore a re tlhapise, a re itshekise. Ke ene yo e leng tlhapiso e e dirang go buetsa se sešwa mo mothong.

Ke ene yo o ikanyegileng gore a phimole molato o o re tlisetsang petso. Ke ene yo o kuelang Lefoko la gagwe, a re: Dikgoro tsa molete wa molelo ga di tshole di na le thata mo godimo ga motho yoo, mo godimo ga phuthago ya gagwe. A go nne jalo tota! Ka mafoko a mangwe re re: Keresete o re fenyetsa mo dintlheng tsotlhe tlabano ya bolele le loso, ke raya le tsona tse re sa di boneng, le tse re neng re sa di bone. Ka loso lwa gagwe o re buletse mojako gore re tsene mo bogosing jwa gagwe, re tshole mo kgalalelong e e fetang ya ga Solomone. Re na le go kgona mo tlabanong e Satane a lelang ka yona go tlosa boitshepo jo re nang le jona ka Keresete. Moriti wa masula otlhe le mewa ya ditlalelo tsotlhe di beilwe mo seleganyong se e leng ditlalelo tsa gagwe le madi a gagwe. Tsa ga Jesu di a phimola, di a tlhapisa, di tlosa tsotlhe tse di bosula. Jesu o ne a nyadiwa thata gore e nne seleganyo sa gore go nyadiwa ga gagwe go fenye tsotlhe tse di ka bong di diragala mo bathong. Ka moo Paulo e bile o tiisa gore go na le go ntšhwafadiwa ga rona ka metlha. Ke sona se se tsoseletsang tsholofelo mo go rona.

Ke ka tsela eo, fa motho yo o ka mo teng a tsoselediwa ka metlha, fa a le mo go Keresete, (2 Kor. 5:17; Baef. 4). Ke kwa go bonalang teng lotshwao lwa boitshepo jwa Modimo jo bo sa bonweng ka matlho a nama. Ba re kolobeditsweng mo leineng la Modimo Rara le Morwa le Mowa o o Boitshepo ka metsi re na le lotshwao loo mo go Jesu Keresete. Ke motho yo o sa bonalang ka matlho a nama, mme tota-tota ka tsela e e kgakgamatsang re a lemoga gore le fa go nna Mowa o o Boitshepo mo go ene ga a fenye, le fa e le e le nngwe fela ya ditlalelo tse re di badileng godimo, le e seng lebitla, le e seng poifo, le e seng nama, le fa go na le eng sa lefela. Ka moo Morena o a batla gore rona le mewa ya rona re se ka ra tlhakatlhakanya tlhogo, le e seng go latlhegelwa ke moko, le e seng gore mewa ya rona e fenngwe sešwa ka go sa utlwe.

A re se ka ra phadisanya, le e seng go tshwantsha dilo tse di bonwang ka matlho le dilo tse di sa bonweng. Kana botshelo ga bo fele mo dilong tseo tse di bonwang. Tse re di bonang di teng ka sebakanyana fela. Ka pele di tla bo di sa tshole di le teng. Dinyaga di a tsamaya, re ntse re le teng, mme go na le ba ba reng: Ga go thuse go kopana le phuthago ya Morena, ga go thuse go dumela mo Moreneng, gonne dipolelele-pele tse di reng o a bowa ga se tsa boammaaruri. Go na le ba ba reng: Fa Jesu a le teng, o tsenyetsang konakalo e e kalo mo bathong? Ba bangwe, le bone ba ba kileng ba bilelwa mo botshelong jwa bokeresete, ba a nyatsa, ba re: Tsotlhe di a tshwana fela, le fa o dumela, le fa o sa dumele, le fa o dumela mo Modimong, le fa o dumela mo medimakong. Tlhokomela, wena yo o utlwang mafoko a a kwadilweng ke Paulo. Go na le sa kamamoso. Ke sa kamamoso se se sa ka keng sa lekanngwa ka metswetswe, gongwe ka diura, gongwe ka dibeke, gongwe ka dikgwedi, gongwe ka dinyaga, le e seng ka go tla ga naledi e e nang le mokgatla. Go lebelela letsatsi la moso oo sentle ga se go tsietsa, le e seng go itimokanya, le e seng go nyatsa, le e seng go tlhapelwa, le e seng go tagwa, le e seng bonokwane, le e seng go utswa, le e seng go bala madi fela, le fa e le se sengwe se se ntseng jalo. O se ka wa lapisiwa ka tse dintšhwa, ka go tlhoka, ka khumanego, ka bolwetse, ka dintsho, ka go latlhegelwa tsa lefatshe. Phetogo eo ya kajeno e e reng dilo tsotlhe di a tshwana fela ke bolele jo bo kotsi tota. Gopola gore dilo tse di bonalang ke tsa sebakanyana fela, mme go na le tse di sa bonalang.

Moapostolo o bua ka ga tsona, a re: Ke tse di sa feleng. Bontle jwa tsona tse di sa bonaleng le kgalalelo ya tsona e eme ka metlha jaaka bosenabokhutlo jwa Morena ka esi.

A re se ka ra dira bolengteng jwa Modimo, fa e se jwa sepe. A go se nne ope mo gare ga rona yo o latlhegelwang ke go ikemisetsa go nna mongwe le Morena le Modimo kwa gae kwa go nang le kgalalelo teng e e utlwalang, e e bonalang. Rotlhe ba re leng fano, a re tlhabaneng le go lapa le go solofologa. A re ipoleleng rotlhe gore Jesu yo o simolotseng tiro e ntle ya gagwe mo go rona o tla e tiisa, le go e feleletsa mo matshwenyegong a re leng mo go ona, le go kamatllelwa ke ene ka go tlamelwa ke ene ka neo ya kgalalelo mo pusong ya ga Rraagwe. Fa a ka fenywa dikgoro tsa molete wa molelo, a go na le sengwe se se ka mo fenyang? Le fa re ka bua, re re: thata ya mmele e a fela, mme mowa a o nne o dumele. Le fa re ka fiwa go tthatlogela mo thabeng e e godimodimo ya mefutafuta ya ditlalelo, a go utlwale gore thata eo ya bokete re ka ema mo go yona, re gorosiwe kwa Modimo o leng teng. Ke Morena Jesu yo o ineetseng go re tshegetska ka thata ya gagwe kwa re palelwang teng, buisa 2 Kor. 4:7-11!

Mo tshimologong ya kgaolo e Lefoko la thero ya kajeno le ntshitsweng mo go yona re bona kaelo gore rona ba re amogetseng Efangele re bakele tse di fitlhegileng tsa ditlhong, re se tsamae mo boferefereng, le e seng go sokamisa Lefoko la Modimo, mme re bonatse boammaaruri re ntse re itshupetsa digakolodi tsotlhe tsa batho fa pele ga Modimo. Re tlhokomele rotlhe gore re se ka ra nyatsa tshiamo ya Modimo ka go itsietsa ka go leka go iponela letlhogonolo mo ditsietsing tse di dirwang ke batho. Re se nne baitsietsi, le e seng baitimokanyi! Tsotlhe tse di fa pele ga matlho a rona, le fa e ka nna eng, di ka fela, le fa e le leng. Ka moo mongwe le mongwe mo go rona a a nnele ruri ka go tlhokomela tsa gagwe, e seng mo go tse di felang, mme e leng mo go tsona tsa Mowa wa Modimo, tse di se nang bokhutlo. Tlhokomelang Moše, ke yo “o neng a itshwarelela ka yo o sa bonweng, jaaka e kete o a mmona,” Heb. 11:27. Mo tirong ya gagwe, le mo botshelong jwa gagwe o ne a tshela mo tumelong eo. A ba a tlhomamisiwa ke Mowa wa Modimo gore a nne yo o ikanyegileng go ya bofelong. Ka letsatsi lengwe molemi mongwe wa botlhale mo polaseng ya gagwe o ne a bua le mokaulengwe wa gagwe ka kemo ya legodimo. Mongwe wa bone o ne a botsa, a re: “Lo gopolang, borre, gore komelelo eo e tla fela fela?” Molemi wa botlhale yole o ne a araba, a re: “Ga ke ise ke bone komelelo e e sa feleng ka pula.” Dilo tsotlhe tse dikgolo mo go tsotlhe mo botshelong ke tsona tse Modimo o di dirileng gore di nne mo sephiring, di sa bonwe ka matlho a nama, mme di bonwe ka matlho a tumelo. Bona, o ikanye lokwalo, le fa o sa itse gore lo tswa kae, gore lo go rute ka ga motho yo o iseng o mmone, gore a go thuse mo go tse o sa di tlhologanyeng, a go ise kwa o iseng o ye teng pele. Le fa go ntse jalo o a dumela. Ikanye Jesu gore a atise tumelo ya gago, a go abele matlho a tumelo, a Mowa o o Boitshepo. Amen.

9. Thapelo: Jesu Morepholosi, re a leboga, gonne o tsholofelo mo go rona, tsholofelo ya botshelo le kgalalelo ya mo legodimong kwa o tla re isang teng mo go Rara. Re galaletsa tshiamo ya gago e re e senoletsweng mo lefatsheng ka Efangele ya gago. Re a kopa gore o re fenyetse bokete jo bo godimo ga rona le godimo ga mekgwa ya rona e e leng nyatsego fa pele ga gago. O re utlwe, o re itshwarele! Re rapela mo leineng la gago le e leng pholoso mo go rona. Amen. Thapelo ya Morena: Rara wa rona yo o mo legodimong ...

10. Sefela sa 256 - 238/248

A kagiso ya Modimo e e fetang tlhologanyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke M. N. Mntambo, ka ngwaga wa 2000/2006/2011.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.